

欽定重修兩浙鹽法志

欽定重修兩浙鹽法志卷二十六

商籍三

列女

明

黃氏汪文華妻文華以母喪廬墓三年哀毀卒氏

冰蘖六十載

舊志

方氏諸生胡承虞妻甫于歸承虞負笈出遊方事  
其祖姑與姑兩世得其歡心祖姑疾封左臂雜羹  
以進立愈姑病亦如之後承虞歸亦疾方又封右

臂以進復愈越數年承虞疾又劇醫皆謝去方曰  
吾臂凡三創三愈幸邀天鑒今寧惜四創乎如前  
法夫復起至誠格神方氏有焉

錢塘縣志

### 國朝

唐氏潘氏姑媳也俱歛人唐適江之涑年二十五  
夫歿遺孤世標甫六歲教養成立爲娶潘兆孟女  
未幾世標又歿潘年二十九欲殉夫地下念姑已  
老夫又無子代奉甘旨者三十餘年衣食皆從十  
指出每至饘粥不給唐年九十三守節六十八年

潘年八十守節五十年人稱江氏兩世雙節

舊志

王氏歛儒士汪知元妻知元疾卒氏年二十五奉姑訓子守節三十年子必遠德秀並爲杭郡諸生迎養於杭浙撫范承謨題

旌建坊崇祀女貞祠

浙江省志

胡氏歛人汪日曜妻胡涵文女也幼失恃孝事祖母既歸汪事姑嫜敬慎不怠年二十夫歿未有子氏曰夫死無子分當死然不可以絕夫嗣乃繼姪爲子恩勤鞠育至於成立家貧依兄嫂爲活卒年

五十

舊志

吳氏憲之女汪用成妻崇禎乙亥居鄰火延燒其室姑不得出火迫甚氏以身蔽姑出烈焰中頭面焦爛姑得無恙子鳴瑞博極經史皆氏所口授也壽八十七著女千字文

舊志

張氏江之崑妻業鹺居常山康熙甲寅閩賊吳安邦入城崑罵賊不屈與子世晟同日被戮氏與媳曹氏欲自縊孫女如娟大呼曰請先母死曹先勒殺之二氏皆自縊

常山縣志

吳氏江廷光妻廷光奔父喪卒於途氏無所出苦

節三十年無異志

舊志

鮑氏舉人經綸女進士汪亢宗妻亢宗病歿氏欲以身殉舅姑勉其立孤乃止已而二子俱殤氏卽

閉戶服滿死

浙江省志

程氏汪用嘉繼室性孝姑臥疾不起者十九年氏晝夜扶持不離左右凡三割股以療其疾前妻所遺子女視如已出一女殉節子鳴烈亦能孝養終

其身壽八十八

舊志

汪氏字玉貞歙巖鎮人幼失恃父用嘉授以孝經  
內則列女傳諸書靡不通曉嫻習及笄歸胡生震  
吉閱四年胡病療歿氏日夕悲號欲以身殉家人  
護持密不得聞康熙壬寅春正月九日姑往賀歲  
氏卽自縊於震吉棺側衣皆密紉啟篋得手書一  
緘視之則告尊輩以不能俱生不忍獨生不敢偷  
生之義震吉所遺書冊集爲一笥大書其上曰付  
孤子祿兒收讀時年二十一有司上其事於巡撫

督學給額以旌

歙縣志

馬氏生員遠平女適汪岳蘊三載夫歿痛不欲生  
絕粒彌日念腹有遺孕不忍絕夫嗣遂繼姪紹武  
後生男紹良撫兩子無異視奉舅姑甘旨無缺孝  
聞閭里訓子孫嚴而有法孫宏禧舉孝廉學臣顏  
光敏題請奉

旨建坊崇祀

錢塘縣志

凌氏年十八適新安汪起勳夫歿遺孤之漳之潤  
氏矢志撫孤上奉舅姑克盡孝道教二子讀書成  
名後以之漳官



敕封孺人巡撫趙申喬題請奉

旨旌表

杭州府志

汪氏張宗儒妻年十九歸張甫三日卽出操井曰  
勉夫力學且曰脫堂上甘旨缺我鍼紉可辦無分  
汝心後儒以嗜學成疾醫罔效欲取刃自裁其姑  
曰汝子甫五月設汝死吾兩人誰依不如先汝死  
奪刃亦欲自盡氏驚而止以事姑撫子爲已任曲  
盡孝養誠其子曰汝身孤危讀書砥行功宜百倍  
延師結友皆吾指血所辦子芬仁邑庠生

錢塘縣志

姚氏又度女七齡母病侍湯藥惟謹人以孝稱之  
十七歸吳霄篝燈佐讀克盡婦道二十六夫亡痛  
不欲生柰家有三喪未舉藐孤在抱不忍委棄飲  
泣含悲力持門戶凡殯葬之事經畫周詳遺孤痘  
殤繼姪爲嗣恩勤無異年六十三奉

旨旌表

錢塘縣志

鮑氏歛人江以鼇妻年二十九夫歿守節四十餘  
年康熙四十五年奉

旨旌表

舊志

吳氏年十八適嚴曾采嚴授新昌教諭未任而卒  
氏婚十載冰霜自厲至六十而歿遺命子燧等必  
告而父友章撫功爲誌吾墓毋忘吾艱苦也康熙  
四十九年奉

旌獎

錢塘縣志

胡氏汪躍妻州別駕濤涵女也幼淑慧嫻內則年  
二十一歸汪汪以名諸生舉明經對策歿於京師  
胡年二十九聞訃欲以身殉上念尊章俯憐稚子  
忍死以婦代子以母兼父備極辛勤後孤復不祿

既以哭夫者哭子又以教子者教孫永霜苦節歷

三十年

錢塘縣志

戴氏生員吳錫妻錫病瘵甫婚卽侍湯藥病革誓請先死其母慰之氏曰女從嚴命以身適人義惟從一不能兩全舅復沮之氏曰翁有叔可奉未亾人少無所出分宜從夫地下且旣以死許義難食言遂從容拜辭尊屬勺水不入口凡可以求死者無不爲之最後給小婢屑金珥并壞玻璃器仰吞之膽破嘔碧血數升死邑人哀之上其事於官且

金塘縣志卷之二十一 二  
醵金葬於葛嶺之西就其地建祠曰吞金祠

錢塘縣志

按祠於庚子年爲王燧毀作別業燧籍沒改僧舍

汪氏贈中憲大夫汪汝謙女太學生吳望中妻生而貞靜動嫻禮法事舅姑以孝望中遊學四方竟以客死氏聞訃慟絕久乃得蘇撫孤璆行俾其成立茹荼飲蘖備極人所不堪已而璆行又死復撫兩孫成立授之室喟然曰而今而後未亾人畢乃事矣壽八十守節五十三年氏少承父訓能詩文及夫死悉焚筆硯及所吟詠故外罕有知者

錢塘縣志

吳氏歛人如梁次女幼端莊通孝經內則年十五  
適文學朱南絃絃得瘵疾氏侍湯藥衣不解帶者  
二載既歿氏屏去羅綺獨處一室非定省享祀足  
不踰閭兩遭火家業灰盡氏百計以供甘旨後三  
十年疾篤姑勸之藥謝不飲體寒索被婢覆以文  
綺卻曰非我所宜揮去之既屬續姑召內戚至死  
所議喪事氏忽張目曰此內寢也雖死不可令外  
人入學使周清原書額以旌曰志盟孤雁舊志  
鄭氏孝廉吉士妹文學汪用昭妻幼喜讀書每就

兄質疑義必通解而後已及笄歸汪代姑經理家  
事能得堂上心昭爲名諸生廣交遊善結納家貧  
氏脫簪珥以供不逮年三十夫歿遺孤九歲姑老  
氏不辭勞瘁供甘旨無缺撫子成立守節三十五

年

舊志

方氏文學振先女幼嗜書史曾刲股療父疾年十  
九歸金建烈氏治家有法二十九而寡卒年八十  
八守節六十年方烈之歿遭兵燹家道中落氏健  
持門戶嚴以訓子嘗述先世事誠以毋忘艱苦有

古陶孟風

休寧縣志

許氏鮑應謨妻壬辰進士許書姪女年二十七而寡上侍六十孀姑下撫七齡弱子娶媳五載而子歿媳黃氏又寡三世孀居零丁孤苦氏承先啟後孝慈並至邑里稱之有三世孤芳一門節孝之譽

舊志

汪氏鮑應桂妻年二十六夫歿遺孤錦錫甫二齡氏教以義方及長命就外傳不事姑息人謂錦錫

母教過於嚴父

舊志



程氏鮑應選妻年二十二夫死於火氏欲以身殉

念二孤文錫世錫尚幼矢志守節之死靡他

舊志

程氏鮑文錫妻于歸未逾月夫死氏年未二十遺

腹生子鳳翔氏撫之茹荼終老

舊志

程氏鮑應佶妻年二十二夫溺水死囊橐蕭然遺

孤策錫方襁褓鞠養成立嘗脫簪珥以奉舅姑氏

每枵腹而堂上甘旨無缺

舊志

方氏鮑元任妻結褵未一載夫歿氏守志不移撫

遺腹子應瑞成立壽終八旬賢著一鄉

舊志

黃氏鮑望錫妻大傑之女于歸四載夫歿奉兩世  
孀姑撫子光朗歷盡荼苦自許氏至黃氏爲鮑氏  
一門七節康熙五十年督學吳垣題請旌表奉

旨建坊入仁錢二縣節孝祠

舊志

葉氏鮑安鼎妻年二十夫歿貧窶特甚藉鍼紉撫  
孤子立忠成立鄉里咸頌其賢鮑氏七節之後葉  
復益而爲八

舊志

程氏貢生葉世寵繼室歸葉未一載夫歿苦節以  
事舅姑色養備至撫前室之女如已出教子義方

有丸熊畫荻之風節孝之稱里黨無異詞云

錢塘縣志

胡氏黟之宏村人適汪純元甫兩月夫卒於杭婦聞訃墮樓絕而復蘇姑諭之曰爾縱欲相從地下應服三年喪氏許諾乃服三年喪日夕悲號不出庭戶服闋婦迎姑拜於堂上曰媳失所天今已終喪弗獲侍奉遂徧拜妯娌諄諄以善事舅姑爲囑乃密紉衣裳絕食七日而死年二十八

黟縣志

汪氏休寧人適同邑庠生吳文斌斌屢躋棘闈齋志以歿氏茹荼守志撫孤成立四十餘年以壽終

舊志

吳氏國學生汪棠妻性至孝有德耀風汪得疾彌  
留之際謂氏曰吾素稔汝志但堂上姑老及此貌  
孤向氏飲泣弗言及汪歿菽水盡歡晨夕罔缺義  
方訓子不少假借

錢塘縣志

吳氏汪廷樞妻樞素庭怯不勝家事氏悉任之時  
翁亦抱病繼姑在堂備參苓供甘脆不遺餘力樞  
疾篤氏祈天請代竟不起未逾月長子復殤次子  
起熹苦孱弱氏竭力維持幸得成立舅姑喪葬盡

哀盡禮勤苦操作里稱慈孝焉

舊志

吳氏年十八適庠生戴永崑年二十夫邁疾卒氏  
觸棺流血不願獨生舅姑諭止之苦節三十五年  
不輕出庭戶不延見姻戚姑疾謹奉湯藥晨夕不  
離及歿喪葬盡禮撫子女各成立浙撫王然督學  
吳垣汪滌各旌其廬康熙五十九年題請建坊雍  
正三年奉

恩詔從祀節孝祠

舊志

潘氏汪之萼妻性謙婉能謹慎以事舅姑萼勇於

行義嘗出千金周急氏脫簪珥相之以禮法治家  
曾元五世同居其鬻人以緩急告者無不應至再  
三無倦容親族鄰里賴以舉火者百餘家年九十  
而卒

舊志

汪氏歛文學鳴烈次女年十九適同邑吳觀珪事  
舅姑惟謹相夫克盡婦道二十五夫歿舅姑已老  
子僅三歲忍死盡脫簪珥衣麤茹素事鍼紉以謀  
甘旨會姑疾割臂肉和藥以進遂得愈稱未亾人  
者四十年後疾篤子國鉞年十六亦割股以療母

氏可謂有子矣乾隆二年奉

旨旌表後從祀錢塘節孝祠

舊志

戴氏年十八適王起泮二十二夫歿事舅姑極盡

孝養苦節三十九年

錢塘縣志

陸氏孫燧妻性端謹明大義年二十五夫亡孝奉

八旬之翁敬謹不怠撫幼嗣思敏成立青年守志

白首完貞康熙五十九年學使汪滢巡撫朱軾會

題奉

旨旌表

舊志

黃氏錢塘貢生汪掄柱伯母汪如衡妻年甫二十  
衡卽早逝無子嗣氏矢志守節至五十五歲而卒  
當夫病時氏晨昏祈禱願以身代後復絕粒欲以  
身殉因姑勸勉纔進粒米守節三十六年婦兼子  
職竭盡孝道平居未嘗一見笑容一飾簪珥紡績  
之暇惟理女孝經訓所撫女宗族鄉黨莫不推敬  
府縣學使俱經旌獎給有歲寒勁節冰雪貞操貞  
節可風等匾額所撫女適黃建績亦早歲守寡至  
今苦節已三十年皆得諸母訓云

舊志



黃氏吳嘉謨妻幼聰慧過人博通經史且嫻內則  
戚屬奉以爲師嘗手訂左傳韓文授其子每與諸  
孫輩論古今成敗事反覆引證至中夜不輟論者  
比之曹大家云

舊志

凌氏黃氏俱歙人姑媳也凌年十八適生員江榮  
舉二十六歲夫歿守節五十九年凡翁姑生養死  
葬盡心竭力無失禮焉壽八十五康熙五十年奉  
旨旌表黃氏年二十二歸凌氏之子江臣年二十八臣  
歿家貧紡績以奉孀姑苦節三十餘年雍正元年

奉

旌表

舊志

畢氏三錫女太學生許頤齡繼室孝事其姑夫歿  
六子俱在稚齡家事巨細一身肩之出納有方進  
退有度延名師集良友以成子學業年六十誕辰  
諸子奉觴上壽氏曰吾半生勤瘁惟冀爾等成立  
以報爾父於地下今志已遂吾從此逝矣遂端坐  
而逝四方人士聞而異之各爲詩文以誄彙曰高

陽集

舊志

吳氏歙人文學汪跼妻及笄來歸敬事姑嫜頗諳  
大體跼喪父哀泣骨立竟以身毀吳年二十四欲  
以身殉念姑老在堂偷息以供甘旨立嗣承祧守  
節三十餘年冰操如一日雍正元年請

旨旌表從祀女貞祠

歙縣志

毛氏儒士鄭宏俊妻上奉兩世姑嫜敬謹不怠結  
褵五載夫邁危疾氏每夜焚香祝天願以身代終  
不起氏絕粒五六日垂危姑慰曰爾止生一女幸  
腹有遺孕若生男能續夫嗣不更愈於死耶氏省

悟後果生男二十餘年茹飲冰蘖女遣嫁男授室

姑尚強飯日進甘旨無缺

舊志

許氏歙縣人國學生鶴齡女年十六適同邑汪宏

事姑以孝聞二十八而寡足蹟不出戶庭時子女

俱幼家貧嘗至饘粥不給矢志靡他卒能教子成

立一女適甲辰進士胡旻年五十四而卒

舊志

張氏汪乘御側室年二十七汪卒荼蘖自甘織紵

以供衣食教二子以義方宗黨莫不稱其賢卒年

六十二

錢塘縣志

戴氏輔侯女進士洪祇妹年十八適國學生汪廷  
枚三載夫歿慟絕復蘇勉從舅姑命含哀盡禮數  
十年足不踰閭歲時伏臘痛哭失聲聞者爲之感  
動鄰里咸稱苦節云

舊志

汪氏歲貢生汪於高女文學戴鏹妻年二十四而  
寡遺孤六月氏欲以身殉姑慰之曰死節易撫孤  
難願婦爲其難者氏領之操作勤苦竟以疾卒遺  
篋有手書千言皆教孤以立身行已之法

舊志

汪氏生員許鼎文妻夫歿氏絕粒三日腹有遺孕

父諭以宜保夫嗣後果生男養育成立巡鹽御史

顓圖表其廬曰守義垂慈

錢塘縣志

胡氏適休寧吳仲升年二十二夫歿痛不欲生姑慰之曰予尚存寧忍棄予耶氏矢志事姑守節五

十四年

舊志

汪氏年十九適儒士張文治孝事舅姑順相夫子結褵五載夫歿氏絕粒數日殞而復蘇復投繯爲家人救免後翁因子喪抱病不數日歿氏傷舅夫並逝乃於夫終七之期自經棺次有司旌其烈祠

女貞祠祀焉

舊志

胡氏黟人汪煜妻年二十四夫死矢節奉舅姑教

子璠讀書成名守節垂五十年

舊志

吳氏歙人一桂次女年十七許字錢塘王之瀚王

貿易金閭病歿氏聞訃欲以身殉父母勸之勿聽

姑至諭之曰爾雖未婚是吾媳也爾死柰吾老何

氏省悟卽隨姑而行易衰麻執婦禮每食必哭拜

於靈鄉里聞之莫不流涕家貧藉鍼紉以爲活姑

賴以存

舊志

王氏汪僑側室文學禹慶女氏通書史奉僑母周氏極孝養周年八十四而終扶持左右割股調羹僑歿三子俱幼養育教誨備極辛勤年八十守節四十年五代繞膝實天之所以酬節孝也

舊志

趙氏貢生汪健師側室汪原配葉氏早歿義不再娶未有子因納氏焉年十九歸汪二十三而寡時子又筠在襁褓恩勤撫養衣食嘗不給有微言勸改適者輒以死誓立心謹慎教子尤嚴守節三十

五年

舊志



邱氏州同知以黃女適國學生汪元善年二十九

汪卒痛不欲生因姑老守節以事迨姑歿喪葬盡

禮茹荼飲蘖守節三十年

舊志

汪氏休寧人年二十適仁和倪瑤結褵五載夫歿

矢志靡他撫孤成立卒年五十八苦節三十三年

舊志

吳氏許字新安胡鶴未嫁夫歿氏卽日過門執婦

禮泣曰吾已作未亾人不死何爲家人勸慰再三

勿聽守伺密不得問踰年投繯卒

舊志

程氏張釭妻夫歿生一子哭其父亦歿媳投繯以殉氏痛不欲生因不忍絕其夫之嗣繼姪爲子教

養成立

舊志

江氏張鏐妻未四十而夫歿三子俱幼江曰夫死予當從死但不忍藐孤之不育以負夫於地下乃延名師躬督課三子皆有聲庠序江以壽考終

舊志

葉氏菁長女適文學吳世模事舅姑以孝稱夫早世哀毀絕食誓不欲生姑曰汝死柰我老何況有遺腹奉姑保嗣事之大者氏泣遵姑命孝敬備至

及生子訓以義方凡祭祀婚姻悉有操持姻戚莫

不加敬

舊志

趙氏歙人吳式鏐妻年二十夫歿繼姪爲嗣矢志

凜冰年五十四守節三十四年學使汪滢以節茂

松筠旌其閭

舊志

邵氏年十八歸江俊二十五夫歿孝事舅姑義方

訓子苦節三十載閭里咸稱節孝云

舊志

姚氏蘆瀝窰生朱吉人妻少習女史識大體年十

七歸朱恭儉循禮得老姑歡未浹歲夫卒遺腹生

女撫嗣子炎嚴而有法晚年出紡績資營先人葬  
事建宗祠置祭產呈縣勒石俾子孫世守勿替邑  
令王偉給旌進士趙光緒爲作傳

嘉興府志

吳氏年十八適王國正二十五歲而國正卒氏絕  
粒投繯願從地下翁姑苦勸得免戡影深閨早夜  
操作雖至戚罕聞聲覩面者至四十二其叔國祥  
始生一子蔭華氏卽敬告宗黨立祀承祧壽七十  
一而卒康熙五十九年奉

旨旌表國祥天性孝友濟困周急事寡姒誠敬備至

舊志

王氏錢塘汪雲瑞妻年二十八而寡子女俱幼有  
伯氏不相顧王益堅持伯氏歿遺二子王收撫之  
曰吾爲祖宗計爾德怨非所計也守節六十三年  
康熙五十二年題請

旌表

浙江通志  
杭州府志

蔣氏仁和朱恆孚側室年二十九而寡事姑撫子  
女艱苦備嘗守節四十三年而卒雍正八年題請

旌表崇祀女貞祠

浙江通志  
杭州府志

唐氏郎氏仁和人姑媳也唐爲沈靈長妻年二十

九而寡遺孤二次子宏道娶郎氏年十七亦寡奉侍孀姑撫姪爲子唐守節二十八年雍正七年題旌郎守節三十九年乾隆十二年題

旌稱一門雙節

浙江通志  
杭州府志

汪氏仁和沈涇妻夫歿逾月送殯歸夜就寢所呼婢至遺書別舅姑服滿卒時年二十一乾隆六年

題請

旌表

杭州府志

顧氏錢塘舉人汪坤妻年十一父病歿哭不絕聲

母慰諭之日不敢哭夜淚漬枕席晚年諸女窺顧  
左臂有三癍堅詰再三顧流涕曰此汝外祖母及  
汝父病劇時所封此汝祖母彌留時所封以和糜  
而進者也

杭世駿撰傳浙江通志杭州府志

周氏錢塘副榜范江妻年二十九而寡翁姑在堂  
事之盡禮撫姪榕爲已子守節三十五年乾隆八  
年題請

旌表

杭州府志

陸氏仁和朱四銘妻年二十七而寡越二年鄰火

逼其廬四銘柩不能出陸以二幼子屬兄卽伏棺  
誓以身殉已而風轉火熄廬舍獲全守節二十八  
年明大義營辦其夫與姑之喪遣嫁其兄公之遺  
女皆從指血出乾隆十二年題請

旌表

王曾祥  
撰傳

汪氏錢塘許浙妻年二十五而寡事姑盡禮撫姪  
爲子克承先業苦節三十八年乾隆十四年題請

旌表

題旌  
冊

孫氏錢塘監生周兆鳳妻姑疾朝夕侍寢室割右



股和藥以進翁姑歿典釵治斂旋以母陳病劇日夜哀號籲天願以身代復割左股以投藥子寓鼎皆教以成名

採訪冊

趙氏沈太白妻夫早喪撫孤備嘗艱苦姑陳病篤趙誓以身代割股至再三姑稍愈持其股而泣呼

曰孝婦氏亦泣

浙江通志

趙氏仁和庠生王達妻年二十三而寡卒年六十五乾隆十七年題請

旌表

公舉事實

朱氏錢塘汪浦妾年二十二而寡佐嫡妻撫姪爲  
子守節五十年乾隆二十五年題請

旌表

杭州府志

王氏錢塘舉人父聞望妻蚤寡苦節撫孤乾隆二

十六年題

旌

汪沆撰傳

鍾氏諸生汪南之妻年十九歸汪踰年夫亡矢志  
苦節孝事翁姑嗣姪道狎撫育成名題請

旌表

公舉事實

王氏幼字方芝芝歿王年十六未婚聞信卽投繯  
家人急救之甦母勸慰再四許歸芝家芝家故貧  
孀母汪慮日後無依不允所請王誓不欲生因防  
護甚嚴不得間越年成疾值上元一婢侍王王賺  
之出戶取飲乘間自縊卒合葬芝家乾隆二十三  
年題請

旌表

袁枚  
撰傳

張氏李氏妯娌也仁和人張爲楊曰廣妻年二十  
七而寡李爲楊曰榮妻年二十四而寡張無子李

遺腹生男承祧大宗爲李後共撫成立事姑均盡  
孝養張守節二十七年卒李守節二十一年卒

杭州

府志

文氏仁和朱學緒繼妻年二十四歸於朱甫十月  
而寡以姪閨爲嗣上奉舅姑克全夫孝下撫嗣子  
閨曲盡母訓守節五十八年乾隆二十九年題請

旌表崇祀女貞祠

公舉事實

朱氏仁和監生戴時若妻蚤年喪夫上事衰翁下  
撫孤子米鹽零雜取給十指從娣卒遺子甫三日

朱撫如己子俾至成人及長孫道亨教之得以成名卒年七十九守節五十餘載

採訪冊

鮑氏仁和受圻妾年十七圻歿先時圻子錫鬯赴禮部試歿於京鮑苦志撫其嗣孫聞望成孝廉旋卒無子氏又與聞望妻王氏撫其嗣孤蕙曲盡劬

勞宗祀賴以不絕守節三十餘年

採訪冊

吳氏方光煥妻蚤失所天苦節五十年

採訪冊

程氏江南歙縣人隨父程俊公業薩來杭適贈修職郎儒士吳維勳二十七歲夫亡孝事舅姑撫育

嗣子於乾隆三十二年題請

旌表

公舉事實

姚氏戚氏嫡庶也姚爲錢塘儒士汪元燈聘妻未  
結褵而元燈先置戚女爲遣室舉一子未幾元燈  
卒姚請於父母登汪氏門居夫喪盡禮親點六經  
教子與戚守節四十餘年

杭州府志

楊氏趙氏姑媳也楊爲錢塘許承勳妻年二十三  
而寡遺孤培甫三齡姑老三世柩殯淺土楊一二  
營葬守節四十八年乾隆三十一年題請

旌表趙爲承勳子培妻年二十三而培卒事姑治家鉅細悉當遺腹孿生撫以成立年四十卒乾隆五十

九年題請

旌表

許氏家傳

吳氏歙縣汪啟耀妻家本貧窶夫客於楚年二十四聞夫訃至矢志守節勤事女紅以養舅姑鞠育遺孤增琪成立授室未幾子與婦相繼歿孫又早殤乃以姪孫爲增琪後苦節四十八年乾隆三十

八年題請

旌表

題旌冊

汪氏仁和人武解元朱仁妻年二十七仁歿於京  
邸子鉉方髫齡汪泣血撫孤事姑盡孝後鉉官廣  
西凌雲知縣封孺人乾隆四十二年題請

旌表崇祀女貞祠

題旌冊

杭氏仁和朱然妻夫死無子家貧苦節乾隆四十  
二年題請

旌表入祀女貞祠

題旌冊

葉氏父澤普妻年十九夫亡撫嗣孤成立乾隆四



十四年題請

旌表

張樞撰傳

袁氏錢塘陳室田妻年二十八而寡撫孤教養兼至以次子琪繼夫兄後年六十五卒乾隆四十七年題請

旌表嗣以琪官貤贈恭人

杭府學節孝題名碑

王氏錢塘監生吳同瑛妻年二十八而寡有子二教養兼至後二子相繼亡僅遺幼孫復訓養成人

苦節三十三年

採訪冊

夏氏錢塘諸生吳同瑗妻年二十一而寡事舅姑

盡禮撫姪一慎爲子守節四十三年

採訪冊

陸氏錢塘庠生吳國錦妻年二十九而寡守節四

十餘年旋一門凋謝陸以子身賴弟存立又十餘

年卒乾隆四十八年題請

旌表

題旌冊

許氏錢塘金椿之妻年二十二而寡事翁如父撫

姪治家盡禮卒年六十乾隆四十八年題請

旌表

杭州學節孝題名碑

宋氏仁和諸生錢修禮妻年二十七而寡姑蚤世  
遺叔修永尚幼教育兼至得以成立卒年六十三  
巡撫熊學鵬題其門曰清標彤管題旌冊

王氏仁和朱學彩妻年十八適朱九月而夫歿王  
柏舟自矢苦節三十餘年以姪衮爲嗣撫之成名  
乾隆四十九年題請

旌表崇祀女貞祠

題旌冊

姚氏余氏姑媳也姚爲仁和張鎮方妻鎮歿卽欲  
身殉翁姑勉以撫孤乃止勤紡織生養死葬皆以

禮子開遠教育成立娶余氏生孫而開遠又卒同  
余撫孤姚守節四十二年余守節三十八年均於  
乾隆四十九年題請

旌表

題旌  
冊

嚴氏戴文煌妻蚤寡撫遺腹子福基成名乾隆四

十九年請

旌

題旌  
冊

汪氏錢塘吳仁標妻年二十一而寡以姪平心爲  
嗣上事翁姑下撫幼子苦節四十餘年乾隆五十

一年題請

旌表

杭府學節  
孝題名碑

汪氏錢塘王崇基妻年十九而寡守節五十餘年

乾隆五十四年題請

旌表

題旌  
冊

姚氏錢塘舉人吳紫滄妻紫滄卒子世騶甫十齡

姚撫以成立守節三十年乾隆五十五年題請

旌表以世騶議敘封恭人

題旌  
冊

施氏仁和葉聲伯繼妻年二十七而寡子以詠方

周晔施事姑以孝教子以禮守節三十餘年卒

杭府

學節孝  
題名碑

項氏錢塘吳厚標妻年二十一而寡事舅姑以孝

聞繼姪雄心為嗣年三十五卒

杭府學節  
孝題名碑

沈氏錢塘張世煌妻年二十八而寡事翁姑盡孝

撫兩繼皆成立家貧艱苦備嘗卒年四十五

採訪  
冊

陳氏錢塘吳驥妻年二十三而寡事姑撫子慈孝

兼盡卒年六十四乾隆五十五年題請

旌表

題旌  
冊

許氏儒士汪辛師妻年二十九而寡撫姪又銘爲  
嗣又銘天訓姪得稻讀書成孝廉守節三十四載

採訪

冊

汪氏錢塘顧天德妻年二十二而寡事祖姑及姑  
盡禮以姪學賢爲子尋學賢又卒復撫姪孫楨爲  
孫教之成立苦節三十餘年卒乾隆五十七年題

請

旌表

題旌  
冊

沈氏錢塘周書章妻壽臻百歲五世一堂乾隆五

十七年題奏奉

旨給帑建坊並給貞壽之門匾額

禮部  
咨文

王氏錢塘貢生許天章妾佐嫡室事姑克盡孝道  
年三十而天章歿苦節數十年子翀日課以書丙

午舉於鄉年六十二卒

吳省蘭撰傳杭府  
學節孝題名碑

畢氏仁和葉世濬妻年二十而寡家貧夜織奉姑  
撫姪爲子教養有方守節五十餘載卒年七十七

杭府學節  
孝題名碑

胡氏錢塘監生金以淦妻年二十九而寡事姑盡



孝撫幼叔及孤均成立年六十一卒乾隆五十八

年題請

旌表

題旌  
冊

汪氏錢塘許泰然妻年二十二歸許未二載而夫  
卒以有身故冀得子以延宗祀匝月舉一女汪誓

不更生絕粒數日而卒

張映辰  
撰傳

胡氏仁和監生李宗烈妻年二十二而寡事翁盡  
孝以姪紹城爲子教以義方卒年五十五乾隆六  
十年題請

旌表

冊題旌

杭氏仁和計升元妻年二十九而寡祖姑及姑皆在堂家極貧杭女紅孝養教子讀書祖姑目疾雙瞽杭每日晨興以舌舐目久而復明人言節孝之報見年六十五歲嘉慶元年題請

旌表

冊題旌

江氏仁 and 人生員朱繡聘妻未婚而繡卒江歸夫家四年祖姑及姑相繼歿於幼叔小姑教育備至婚嫁盡禮撫姪福年爲己子教之成名嘉慶元年

題請

旌表

題旌冊

仲氏仁和鄭基妻年二十三適基半載基渡錢江  
溺焉尸失所在仲乘小舟沿江上下號慟一晝夜  
得尸歸變奩具以斂手描夫像朝夕事之姑老勤  
鍼黹以養守節四十餘年

杭府學節孝題名碑

朱氏仁和方有坤妻年十八歸方十七日而有坤  
卒以族姪沆爲嗣纔五齡引翼至成人守節五十

餘年而歿

杭府學節孝題名碑

鍾氏錢塘沈思文妻年十九而寡家無立錐苦志

厲節見年七十八歲

採訪冊

汪氏錢塘吳同璠妻年二十二而寡撫姪一慙爲

子守節四十餘年

杭府學節孝題名碑

谷氏錢塘莫廣義妻年十九而寡事翁姑撫幼子

備歷艱辛見年五十五歲嘉慶三年題請

旌表

題旌冊

吳氏戴文默之妻蚤寡苦志守節嘉慶三年題請

旌表

題旌冊

葉氏錢塘陳世潤妻年二十九而寡撫姪繼祚爲

子苦志教養守節三十餘年

杭府學節孝題名碑

鮑氏仁和葉寧遠妻年二十一而寡繼子以澧撫

之成立守節三十餘年

杭府學節孝題名碑

陳氏錢塘莫同璆妻年二十六而寡事舅姑以孝

稱

採訪冊

陳氏錢塘監生吳一恒妻年二十五夫亡慟不欲

生因腹有遺娠不果死生子理諤教以成名一生

苦節

採訪冊

金氏錢塘許景懷繼妻年二十九而寡矢志守貞  
越七年而子殤越十二年而翁歿金爲翁姑及夫  
營葬盡禮守節三十餘年

採訪冊

吳氏錢塘監生鄭紳妻年二十四而寡紳卒吳爲  
營窀穸上及三代撫孤有成見年五十九歲嘉慶

三年題請

旌表

題旌冊

王氏仁和儒童姚清妻年二十歲夫歿家無恆產  
舅已年邁氏日夜紡織以供養膳迨舅病劇泣謂

之日子不幸爾夫早喪予又延喘十有餘年此皆  
賴爾孝養所致今疾不起爾熒熒無子累爾苦守  
至此何極言訖而逝氏典鬻淨盡以資喪葬聞者  
皆爲墮淚守節六十年嘉慶六年請

旌題旌  
冊

周氏錢塘監生顧天敘妾年二十五而寡見年五  
十七歲守節三十餘年

採訪  
冊

任氏錢氏王氏葉氏皆妯娌也任爲錢塘吳聿綱  
妻年十七而寡撫遺腹子培婦節母範爲閭里冠

錢爲聿經妻年二十九而寡二子增坦俱幼錢苦  
節課子成立王爲聿紀妻年三十而聿紀卒遺孤  
墉纔五十八日撫育備至葉爲聿緯妻年二十八  
而寡無子守節與任王錢並以貞操著稱一門四  
節云

採訪  
冊

江氏杭州項紹祖妻年二十二歲夫歿子大桂纔  
三歲奉養舅姑及祖姑克盡孝道守節三十五年

採訪  
冊

潘氏王坤年妻居德清年二十而寡子廷育甫晬



歲食貧撫養苦節三十九年廷育先潘二年病死

竟無嗣閭里哀之

採訪冊

王氏張方來妻居嘉興年二十一歸方來四十日

夫死守節三十八年閉戶熒熒紡績自給

嘉興府志

張氏監生吳守頤妻居嘉興年三十夫死子坦甫

九歲守貞教子治家有法

採訪冊

諸氏父湖妻年二十七夫亡食貧教子苦節五十

餘年

採訪冊

葉氏仁和諸生夏璜妻年二十三歸璜家徒壁立

越三年璚卒遺腹生子恩勤鞠育備歷艱辛翁始  
相繼歿喪葬盡禮子甫冠又遭疾卒葉仰天椎心  
曰未亾人不卽從夫地下者爲延夏氏一脈耳今

奚以生爲泣告先靈闔戶自經死

金甌撰傳杭府  
學節孝題名碑

江氏贈文林郎戴永梓妻年十九而永梓卒慟哭  
欲殉舅姑慰勉之立姪炳爲嗣辛勤教育守節二  
十年卒

湖州府志

後炳以孝廉出宰雲陽彭水清介有

惠績人謂得之母訓居多

採訪

許氏戴永榮妻長子炳出繼永梓後氏撫幼子焜

成立飲藥茹荼苦節彌堅

湖州府志

田氏錢塘汪南山之妻年二十二而寡奉姑者十二年祇憑十指姑歿斂含盡禮子亦成立見年五

十八歲守節三十餘年

採訪冊

汪氏歙縣唐官富妻年十七歸唐舅忽發狂疾不知所之官富號泣追尋涉水溺死汪撫遺腹子苦

節數十年里人稱其夫婦爲節孝雙美云

勉戒切要錄

鍾氏仁和朱慶年妻未婚夫卒鍾年二十四歲守貞自矢夫家無以爲生戚族勸解再三氏心益堅

越二載卒歸夫家以十指給饋粥孝奉舅姑甘貧

如飴

採訪冊

冬梅徽郡許世達使女也年十五世達歿遺子未  
周晬主母亦病篤冬梅泣曰主母萬一不幸婢子  
願撫幼主泊歿家人利其資欲先嫁冬梅冬梅度  
不可脫慨然登輿路經世達故人汪某之門曰曩  
有服飾寄此請入取之遂下輿訴於汪某事得已  
撫主成立娶婦育子許氏宗祧藉以不墜壽八十  
二以處子終

勉成切  
要錄

葉貞女名娟錢塘訓導葉庠樞之女少聰慧讀書  
知大義兼嫻女紅笄而失恃事父至孝下撫弟妹  
有疾終身不字著有詩二卷不以示人年六十七

卒

採訪  
冊

王氏錢塘庠生王鏐女朱鳳苞妻夫卒未葬嘉慶  
元年十月鄰人失火王叔伯皆遠宦家無壯丁昇  
柩甫出門火及之昇柩者逃促氏疾走氏號泣不  
行伏柩上焚死三子皆幼牽母衣同斃時氏年三  
十九鏐字蓮湖工詩有集四卷

顧光  
撰傳

汪氏休寧方百慶妻年十八而寡家極貧以十指  
所出撫遺女育繼子苦節數十年見年五十六歲  
採訪冊

趙氏休寧余益元妻年二十三而寡逾年遺女殤  
趙以鍼帶自給年六十四歿採訪冊

余氏休寧潘成老妻年二十九而寡家貧甚茹荼  
養子得有成立見年六十七歲採訪冊

汪氏幼字仁邑庠生孫炳子大有炳歿大有悲毀  
殊甚遺命攻書摒擋家務外卽寢苦發憤竟以哀

勞致羸疾卒汪年二十歲聞訃投繯幾殆母葉勸  
救得免遂矢志奔喪事老姑以孝稱守貞三十七

年

杭州府志

江氏幼時刲股療母疾以孝聞長子汪棠之子燦  
將娶而燦歿江年十九矢志守貞願以斬衰奔喪  
父母不許遂絕粒誓死以殉姑聞之高其義迎歸  
孝事兩代孀姑二十五年如一日喪葬盡禮守貞

五十五年

杭州府志

鮑氏歙縣人鮑倚樓女年二十一適錢塘庠生王

世法婦三載夫卒氏矢志孝事舅姑喪葬如禮撫繼子士模成立又撫叔氏三女以時遣嫁苦節五

十一年

王氏家傳

黃氏年十八歲適錢塘貴州水利糧驛道沈遷爲側室二十八歲夫故守節見年七十二歲於嘉慶

六年請

旌

題旌冊

吳氏錢塘學生許承堯妻承堯割股療母得疾吳卽割股療夫不效尋卒無子伯兄承基以次子嗣



麓嗣

載前人物

麓年二十七又卒吳復與婦葉氏撫

兩孫皆成立西湖昭慶律寺戒壇燬於火吳獨力

起建歸然一新

昭慶寺志

居家登樓拜佛五十年如一

日壽八十一無疾終

家傳

今葉長齋繡佛又將二十

年苦志繼姑稱雙節云

採訪冊

李氏秀水葉廷璋妻年二十五歸廷璋時廷璋已

病療與姑共寢醫藥調護唯謹甫九月而廷璋卒

食貧守節奉姑盡孝撫嗣子教以成立卒年五十

四

採訪冊

徐氏秀水汪勝林妻年二十七而寡僅遺一女熒  
熒相依荼苦冰霜垂四十年女適嘉興葉明山年  
二十七亦孀居貞操如其母

採訪  
冊

朱氏錢塘監生項廷機妻廷機力學成療早歿氏  
矢志奉姑以孝聞延師課二子脩脯飲膳必極豐  
腆不繼質奩飾佐之壬申次子範年舉孝廉人皆  
以爲尊師之報壽八十六無疾終其姪媳沈氏年  
二十一而夫壽元凶卽奉其木主於所居之樓晝  
夜對之悲泣歲時則奉木主至家廟祭畢復歸於

樓率以爲常持齋服布苦節以終

家傳

潘氏仁和諸生沈同鳴妻年二十一而寡同鳴字直夫有文名無子潘抱其遺文矢志付剗劂以不死其夫同邑諸門人爲刻直夫遺文稿行世潘立繼守貞年四十一嘔碧血卒苦節二十餘年

陳庭松撰

欽定重修兩浙鹽法志卷二十六終